

Sanhgyangh:

Douhung Hwnj Loz Baij Fungcingz

Ndwen 6 ngoenz 22, Sanhgyangh Duncuz Swciyen banh aen yizsi douhung hwnj loz Aen Cungsims Comz Sanq Bouxhek, yungh caij din venz、caeqbaiq hwnj loz、gveng dangz daengj conzdungj yizsi, langhbaij gij yinxdaeuz vwnzva laeuz giuz Mbanjdung, yinx ndaej haujlai bouxhek daeuj yawjngonz. Bineix, Sanhgyangh yungh aen seizgei ciepbanh Aen Hoihhung Hwngfat Lijyouz Canjnieb Gaiq Daihngeih Liujcouh Si, haenqrengz guh ndei lijyouz giekdaj sezsih, doidoengh gingjih daezdangj swnggaep, roengzrengz guh ndei gingjih youqgaenj, hawj Mbanjdung lijyouz engq gyaundeih.

(Gungh Bujgangh/龚普康)



▲Gyoengqvunz youq baihnaj douhung caij din venz.

Lungzswng:Runghbya Mbanjmyauz Youzcaz Homfw

Ndwen 6 ngoenz 20, youq Lungzswng Gak Cuz Swciyen Veijgyangh Yangh Sinhcai Cunh, beixnuengx Myauzcuz cingq guh youzcaz.

Youq Lungzswng Gak Cuz Swciyen, haujlai beixnuengx Myauzcuz ngoenz sam donq cungj liz mbouj ndaej youzcaz. Moix baez miz hek daeuj, beixnuengx Myauzcuz cungj guh youzcaz. Seizneix, riengzdwk lijyouzey hwngfat, youzcaz Mbanjmyauz ndaej daengz gyoengq bouxhek gyaemaij yied daeuj yied lai, baenz “gaiq baiz gim” ndaw gij gwn ndei lijyouz dangdieg. Bi 2018 ndwen 12, “gij dinfwngz guh youzcaz Myauzcuz Lungzswng” ndaej liedhaeuj swcigih gaep feihvuzciz vwnzva yizcanj mingzloeg.

(Vangz Yungjdanh/黄勇丹)



▲Vunzmbanj cingq guh youzcaz.

Sihlinz Nazhou Gaujien Sou Ndaej Lai



▲Boux ndaem ien baij gaujien henjrdrwd.

Yangz Cwngvaz、Yangz Cwngzyungz、Yangz Yangjcangh gungh sam ranz ndaem 51 moux, ranz bingzyaenz 17 moux. Aenvih dinfwngz son ndaej daengz、vunzlai roengzsim guenjleix, seizneix gaujien gaenq gauj baenz ceiq noix miz 65% doxhwnj dwg mbawien ndei, ciuq gyaqcienz soucawx bi’ gvaq daeuj gujsuenq, 51 moux gaujien neix gyaqcienz dij daengz 20.40 fanh maenz, ranz bingzyaenz souhaeuj 6.80 fanh maenz. Boux ndaem ien sou ien liux le lij ndaem miuz haeuxnaz ndeu, moix moux lij miz souhaeuj 0.15 fanh maenz baedauq.

(Lij Sivaz/李世华)



▲Yienjok yienhciengz.

《Duzromh Iq Mbanjcuengh》 Bae Mbanjbya Mauznanz Yienj

Ndwen 6 ngoenz 21 banhaet, aen hozdung cunzyienj 《Duzromh Iq Mbanjcuengh》 heiqmoegyau lwgnyez maenhndei swcigih bae daengz Vanzgyangh Mauznanzcuz Swciyen Daanh Yangh Cungsims Siujyoz, yienj ciengz heiq caensaed ndeiawj ndeu hawj gyoengq lwgnyez yawj.

《Duzromh Iq Mbanjcuengh》 yungh gij yawjgak lwgnyez yienh’ok gij lizsij ronghlwenq Baksaek Gijyi, lwnhgangj le gij gojgaeq bouxcoz nyezrauh Veiz Siujsanh ndaej daengz bouxdaiqdaeuz gwzming sonyinx byaij hwnj diuzroen gwzming, yienh’ok gij lizsij beigingj caeuq gij ginggvaq buekguh Baksaek Gijyi, dwg bouh heiqmoegyau lwgnyez maenhndei gingqlaex ciuhlaux gwzming、danqhaenh Cungguk moq ndeu.

Gwnz daizheiq, yiengh moegyau lengj、heiq ndeiawj caeuq yienj ndaej mizyinx, yinx ndaej gyoengq lwgnyez caengz ndaej yawj gvaq heiqmoegyau bae yawj heiq, yienjok yienhciengz sing riu、sing dopfwngz raq dem raq. Doenggvaq hozdung, hawj gyoengq lwgnyez ciepsouh gyaezguk cuji oenqnyumx, caez-yiengj gij cwngzgoj yisuz vwnzva minzcuz maenhndei.

(Veiz Yui Cinz Hungzboh/韦睿 覃洪波)



▲Hagseng yinx yawj heiqmoegyau dahraix.